



Gvntherus ex illustri familia Bambergæ natus, à teneris annis operam literis dedit, atque multis artibus & uirtutibus clarus euasit. Ac cedebant plurima corporis bona, forma, robur, proceritas, & singularis uitæ integritas. Itaque sede uacante omnium consensu præsul Bambergensis electus est. Eam Ecclesiam per aliquot annos optimè administravit, atque inde magnam gloriam acquisiuit. Cum autem eo tempore Germaniæ proceres inter prima pietatis opera numerarent Hierosolymam & sacra Christi uestigia uidisse, Guntherus communicato cum amicis consilio quoq; eò proficisci statuit. Id cum alij intellexissent, statim Sigefridus Moguntinensis, Otto Ratisbonensis, Vulhelmus Traiectensis, & multi alij ex proceribus Galliæ & Germaniæ se se ei coniunxerunt, anno millesimo sexagesimoquarto, tempore autumnali. In expeditione illa propter uirtutum excellentiam, & admirandam corporis dignitatem Guntherus primas habuit, ita ut aliorum rex uideretur. itaq; multi ex urbibus & agris eius spectandi studio confluebant, et quisq; secum bene actum credebat, cui eum uidere contigisset. Vnde cum in diuerlorijs quiescerent, atq; turba ipsis molesta esset, cæteri Episcopi ei persuaserunt, ut in publicum prodiret, & obdidentem fores multitudinem suo spectaculo à cæterorum uexatione auocaret. Tantum corporis splendorem uitę innocentia ac morum temperantia augebant. Verùm ipse hæc omnia propter Deum contemnebat, atque se se etiam infimæ conditionis hominibus adeò popularem faciebat, ut quandoq; à seruis suis contumelias uerborum patienter ferret.